

Jon Pult sco locomotiva

Partida socialdemocratica dal Grischun

DA GION NUTEGN STGIER / ANR

■ **La finamira da la ps grischuna è da defender cleramain il sez da cussegliera naziunala Silva Semadeni. Quai saja però na per sasez. Cun Jon Pult sco candidat principal duai quai esser pussaivel.** Da tut las regiuns dal chantun èn ils socis e las socias vegnids al di da partida dals socialdemocrats grischuns. En il center da quell'occurrenza a Cuir èn stadas las nominaziuns dals candidats e da las candidatas per il parlament federal. *Doris Caviezel-Hidber*, la vicepresidente da la ps chantunala, ha manà la radunanza en moda cumpetenta. Ella ha ditg che per esser er ils proxims quatter onns en il cussegl naziunala saja la ps grischuna dependenta da mintga singula vusch dals commembers e da las commembras, però er da tuts simpatizants da la ps.

Ina vaira sfida

Lukas Horrer, il commember da la direzzion da la ps e secreteri, ha ditg ch'ina elecziun d'ina candidat ubain d'ina candidata da la ps saja ina gronda sfida e quai fin tar il di da las tschernas federalas il mais d'october. Horrer ha ditg che l'elecziun d'in soci u d'ina socia da noss chantun en il cussegl naziunala na saja segir betg uschè clera. Da pensar che quella finamira saja simpla saja gia in vair sbagli. La pld haja avant otg onns er carti che la reelecziun dal cusseglier naziunala *Tarzius Caviezel* saja per sasez, ed a la fin finala pers quel sez en la chombra gronda a Berna. Cun avair la ps sin sia glista trais

dunnas haja ella segir in bonus per far bleras vuschs e per defender il sez da cussegliera naziunala *Silva Semadeni* che renunzia ad ina reelecziun.

Il «shooting star» duai reglar tut

Cun grond applaus èn lura ils dus candidats *Jon Pult* e *Philipp Wilhelm* e las trais candidatas *Erika Canzengli*, *Sandra Locher Benguerel* e *Franziska Preisig* vegnids nominads per las tschernas federalas. A la testa da la glista stat cun Jon Pult il «shooting star» da la ps grischuna sco locomotiva che duai far bleras vuschs. Er sch'el ha be 34 onns, sin champ politic ha el gia sa fatg in num e quai betg mo en il Grischun, mabain er en Svizra. Gia oz ins dastga dir che Pult ha grondas ambiziuns politicas en cas d'in'elecziun en il cussegl naziunala ubain er en il cussegl dals chantuns. Ses profil politic, sia retorica exemplarica, sia gronda savida e ses carisma singular èn bain ina basa per avair success er a Berna e per far bleras vuschs per defender il sez da la ps. Avess Pult da vegnir elegi en il parlament svizzer, lura è el segir en intgins onns in candidat per d'entantar cusseglier federal. Las qualitads per quai èn avant maun e vitiers vegn er che Pult discorra perfetg tuttas quatter linguas naziunalas.

In team cun ina tgapientscha vicendaivla

La successiun dals nums sin la glista hann ils dus candidats e las trais candidatas fatg sez, ha ditg Caviezel-Hidber. Quai conferma er ch'entaifer quel team saja



Vulan ir a Berna: Ils candidats e las candidatas da la ps per las elecziuns federalas Jon Pult, Sandra Locher Benguerel, Franziska Preisig, Erika Cahenzli-Philipp e Philipp Wilhelm (da san.).

FOTO TH. GSTÖHL

avant maun ina tgapientscha vicendaivla. Locher Benguerel, ella figurescha sin il segund plaz da la glista, suenter ella vegn Preisig e sin il quart post sa chatta il num da Cahenzli-Philipp. Philipp Wilhelm, il president da la ps grischuna, el è sco davos sin la glista.

Trump, Putin ed il clima

In tema fitg preschent tar las argumentaziuns dals candidats e da las candidatas per far il zap a Berna è cunzunt stà il clima. Da quel saja d'avair quità, respect e tgirar anc dapli en il futur. La Svizra, quella haja segir na d'avair in parlament che

fetschia politica sco Trump e Putin, avess la ps d'avair anc dapli represchentants e represchentantas en il cussegl naziunala ed en il cussegl dals chantuns. La solidaritad tar ils immigrants e tar tuts conumans e l'avertezza tar l'Uniun europeica sajan er en il futur da gronda muntada.